

我叫黃金福, 而家八十歲, 住左差不多五六十年, 向人買地, 起屋來住, 養大 d 仔女, 住得咁好, 種咁多果樹, 花呀, 我幾多心血, 而家無啦啦話要搬走我, 咪好慘囉。

我地係靠耕田種菜賣菜, 養雞養鵝養鴨, 係咁積埋積埋的錢, 起多 d 屋來住, 等仔仔孫孫都有個寶, 而家要收左佢, 冇田耕, 冇得食, 又有屋住, 無家可歸, 諗到都好淒涼。

係度住左幾十年, 都好開心, 我而家仍然種菜種花, 生活都幾好呀, 慳慳儉儉, 菜唔駛買, 買 d 豬肉煮, 我都慳慳地過日子。上樓, 坐住來食, 去邊度搵錢食呀。

政府安置, 或者攞綜援, 果 d 我唔係幾想, 想自力更生, 自己賺左自己駛。而家 d 人笑我, 你咁勤力做咩, 向政府攞錢, 我話唔得, 自己行得走得, 我健健康康, 勤勤力力做, 唔荒冇得食。

你話搬我上樓住, 坐定定係度, 好唔慣呀, 好似當我隻雞咁困我係度, 咪困死我, 又有得郁, 好容易就瓜左啦, 過年就死左啦, 困住我唔得架, 我鍾意兩頭走, 掘吓地, 種下菜, 除下草。而家住係度, 我都有話在屋企坐, 我多勞動呀, 病痛都少 D。

上樓好唔慣, 有時我去個女度, 我都唔識搭電梯, 邊棟樓又認唔到, 有時去錯門口坐係度等, 唔識字, 去十七樓去錯十一樓, 朦查查走去人地門口。有時返大陸住酒店, 幾好的床都馴唔慣, 我係住自己呢 d 狗寶, 就舒舒服服。總之我唔搬, 繼續係度住, 我就安安樂樂啦。

知道拆, 心情唔好囉, 馴又馴唔著, 食又食唔好, 好似好辛苦, 唔舒服咁囉, 個心 lolo 變, 都好知點。

我只係想求政府唔我拆我屋、搬我走, 幾十年, 人地都話我都落地生根, 生穩根架啦, 我都係唔願走, 我都係賴架啦, 除非抬我走。

2009年5月14日